

Mál nr. 202/2009

M

og

Vátryggingafélagið X v/ ábyrgðartryggingar Reykjavíkurborgar.

Skemmdir á bifreið er henni var ekið í holu í malbiki á Víkurvegi í Reykjavík.

Gögn.

1. Málskot, móttekið 10.6.2009, ásamt fylgigögnum.
2. Bréf X, dags. 24.6.2009, ásamt fylgigögnum.

Málsatvik.

Að kvöldi þann 22.12.2008 var bifreið M ekið eftir Víkurvegi. Lenti bifreiðin í holu í malbikinu og við það eyðilagðist dekk og felga á hægra framhjól. Myrkur hafi verið og útilokað fyrir ökumann að forðast holuna.

Samkvæmt skýrslu lögreglu vegna atviksins barst henni tilkynning kl. 21.09 með beiðni um að fara á vettvang, en vegfarandi hafi hringt þaðan og tilkynnt um holuna og hún væri búin að valda tjóni á mörgum bifreiðum sem hefðu lent ofan í henni. Af hálfu lögreglu voru starfsmenn Reykjavíkurborgar kallaðir út til að lagfæra götuna. Hafi holan myndast í veginum vegna hláku sem hafi verið á umræddum tíma. Stærð holunnar hafi verið 155x75 cm og dýpt 12 cm.

Í tölvuskeyti deildarstjóra framkvæmdasviðs Gatna- og eignaumsýslu Reykjavíkurborgar, dags. 30.12.2008, segir að á umræddum stað hafi malbik verið byrjað að slitna og hugsanlega gæti myndast þarna hola um veturinn miðað við okkar veðurfar. Enginn hafi þó séð fyrir að hola myndi myndast eins fljótt og raun varð. Laust fyrir kl. 22 umrætt kvöld hafi bakvakt verið kölluð út og aðvörunarbúkki hafi verið settur við holuna, en að morgni næsta dags hafi verið gert við hana til bráðabirgða.

M telur að kenna megi lélegum frágangi um hvernig fór og hefur krafist bóta vegna tjóns á bifreið sinni úr ábyrgðartryggingu Reykjavíkurborgar hjá X, en félagið hefur hafnað bótaskyldu.

Álit.

Samkvæmt gögnum málsins hefur ekki verið sýnt fram á að holan hafi myndast vegna ófullnægjandi frágangs við malbikun götunnar eða fyrir vanrækslu starfsmanna borgarinnar við viðhald hennar. Samkvæmt þessu og að öðru leyti með vísan til niðurstöðu nefndarinnar í máli nr. 115/2009, er varðar ábyrgð Reykjavíkurborgar á tjóni á annarri bifreið sem lenti í sömu holu og hér um ræðir, verður ábyrgð ekki felld á Reykjavíkurborg og fæst tjónið því ekki bætt úr ábyrgðartryggingunni.

Niðurstaða.

Tjón M bætist ekki.

Reykjavík, 14. júlí 2009.

Rúnar Guðmundsson hdl.

Valgeir Pálsson hrl.

Jón Magnússon hrl.